

# Vunn weesche Klima-Erwärmung

Omm Stommdisch hawwe merr iwver des komische Wedder gebabbelt, wasmerr im Oktower gehabbd hawwe. De erst wars onn Kerb su warm wie schunn long nimmi unn dann hotts e paar Daach später enn scheene Frost gewwe.

Wie gibts donn su ebbes?, frächt de Karl. Merr dut joo iwverall lese, dass die Erwärmung vumm Klima onn monschem schuld wär, awwer wenn dess su werdd in de nächst Zeit, mol kalt, mol warm, donn kann merr sich joo uff nix mieh verlosse.

Ei gugg doch emol, saach isch, der Storm driwwe in Amerika, was der alles kabutt gemacht hott. Doo saache selbst die Amis, dass langsam enn Haufe mieh Strom vumm Wind mache solle, weil die Schåde im Lond deete sunnst alls greeßer wernn.

Seet de Schorsch: Isch waaß nitt. Ess kann joo soi, dass die Luft wärmer worrn iss in de letzde John, awwer wenn weider su vill Windrädder in die Londschaft kumme, hier unn aach in Amerika, dann werdds widder kälder.

Wie kimmsde donn doodruff?, frächt de Karl. Ei die Windrädder solle doch grad die Erwärmung vunn dem Klima abbremse?

De Schorsch hott e gons ernst Gesicht gemacht. Noch kooner iss druffkumme, dass die Windrädder genau dess Geeschedeil vunn dem mache, was se mache solle.

Awwer du bist druffkumme, habb isch gesaat, dess, Schorsch, mussde uns erklären.

Mach isch, seet de Schorsch. Also: Habbderr dess gelese? Omm letzde Somsdaach im Okower sinn in de Stadt Ilmenau in Thüringe zeh Zontimeder Schnee gefalle unn der iss aach e gons Zeit liehe gebliwwe. Isch frooch eich: Wenn Schnee falle dut unn der aach noch liehe bleibt, isses donn kalt odder warm drauße?

Was e Frooch, seet de Karl, ei nodierlich isses kalt drauße.

Jetzt hott de Schorsch noch ernsder geguggt unn gefroocht: Hott onn dem Somsdaach bei uns hier Schnee gelesche?

Naa, saach isch, mir hadde koon Schnee.

Unn weider frächt de Schorsch: Unn wo sinn mieh Windrädder, in Thüringe odder hier bei uns in Hesse?

In Thüringe, saach isch, als mir vorsjohr dort warn habb ischs geseh, iwverall stiehnerum.

Sehderr, seet de Schorsch unn hott zum ersde Mol gegrinst. Weil die Windrädder mache kalt, unn weil in Thüringe mieh stiehn als in Hesse isses dort kälder. Unn isch saachs eich: Wenn mir in Hesse aach su vill Windrädder uffstelle wie die in Thüringe, donn werdds bei uns aach kalt unn immer kälder.

De Karl hott misch oogeguggd unn isch habb de Karl oogeguggd, awwer gesaat hawwe merr nix, weilmerr gewart hawwe was jetzt kimmt.

Jetzt grinst de Schorsch noch mieh. Doo guggderr, gell? Isch saachs eich: Weil die Windrädder sich drehe unn drehe dun se die Luft abkiehle, su ähnlich wie wensde im Kaffee mett doim Leffelsche riehrn dust, doo werdd de Kaffee aach kälder. Odder in de haaß Subb: Je mieh de mettem Leffel im Deller riehrn dust, je kälder werddse. Unn su isses aach mett dene ville Windrädder: Die riehrn die Luft kalt, unn wens mieh Windrädder gewwe dut, werdd die Luft kälder unn dann duts alls mieh Schnee gewwe. Koo Klimaerwärmung dorsch mieh Windrädder? Dass isch nitt lache due!

Eiern Honnes